

Cançon de las segas.

Aval, sul pont de la Cadena
En anant dalhar lo prat grand
Passavan Ramon et Bertrand
La traita votz de la Serena
D'al fons de l'aiga lor cantèt
Una cançon que los perdèt :

“Cranes enfants, bèla joinessa
Que setz la flor de mos valons
los prats son grands, los jorns son longs
Auretz ben temps per l'èrba espessa
de vos confir dins las susors
Prèp de mon aiga, assetatz vos”

Repic :
“Qu'al bòrd del riu cante la calha
Cante lo mèrlhe e mai l'auriòl
Que sus la flor lo parpalhòl
Dins la rosada se miralhe
Que la cigala o lo grelhon
Buten rasclèt e carilhon”

La traita votz aital cantava
D'aval montava per amont...
Tan plan que Bertrand et Ramon
Dins lo gorg plond que los tentava
Mitat velhant, mitat raivant
Fèron lo saut per prene un banh

Las fenejairas del vilatge
Venián fenejar lo prat grand
Sonèron Ramon et Bertrand
Dins lo randal, dins lo boscatge...
Bertrand, Ramon, ailàs ! ailàs !
Del fons del gorg tornèron pas

E dendespuèi sul bòrd de l'aiga
Ont dòrmon los enfants perduts
A mièja-nuèch s'ausis un bruch
Que la nichola se'n esfraia
E lo matin totas las flors
N'an los ulhons molhats de plors

Bèla joinessa degordida
Quand passaretz aval sul pont
O ! fintetz pas dins lo gorg plond...
Anatz dalhar l'èrba florida...
De la Serena e sas cançons
Paures enfants, mesfisatz-vos.

Justin Bessou.